

四庫全書

史部

欽定四庫全書

皇朝通志卷八十九

食貨畧九

錢幣

臣等謹按錢幣之制漢之五銖唐之開通差為得中其餘非失之太輕即失之過重而積弊叢生有不可究詰者及前明官鑄漸偷私錢日甚至熹懷時而其弊極矣我

國家法制詳備府事修和泉貨流通盡善無弊自
龍興之初即鑄錢二品迨

定鼎燕京內則設寶源寶泉二局於

京師外則開局鼓鑄於直省輪郭肉好輕重適中通
自西陲底定開局於葉爾羌阿克蘇等城遵式改
鑄荒陬僻壤一體流通錢法之盛超越前古至於
金銀交鈔之屬均以濟錢之不足而銀錢互權實
為上下通行之幣以故輪納國用惟以銀錢兼收

而鈔法遂永行停止若夫開採銅鉛轉輸撥濟其所
以籌鼓鑄之需者實詳且盡焉茲輯通志特詳
書錢幣之大端著於篇

天命元年倣古九府圜法鑄錢二品一

國書一漢字輪郭外周文曰天命通寶其滿文一品
錢質較漢文一品頗大

天聰二年鑄錢二品形質如舊文曰天聰通寶至
世祖章皇帝定鼎燕京大開鑄局以足國用始定為一品

設寶泉局屬戶部寶源局屬工部文曰順治通寶

按明直省鑄局皆稱寶泉本朝惟京局稱之每局以漢侍郎一員督理

錢法滿漢司負各一人監管局務開鑄以一期為

一卯計數以千錢為一串始定制以紅銅七成白

銅三成配搭鼓鑄每銅百斤折耗十有二斤以一

萬二千串為一卯每年額鑄三十卯每文重一錢

二分凡錢七文準銀一分其舊錢不如式者以十

四文準一分四年戶部議錢價既重不便行使請

更定為每十文準銀一分又請於各省重鎮頒式開鑄於是開山西陝西省及密雲薊宣大同延綏臨清等鑄局後又開

盛京江西河南湖廣省城及湖廣之荊州常德二府鑄局五年開江南之江寧府鑄局停

盛京延綏二局六年移大同局於陽和城開浙江福建山東各省鑄局七年開湖廣襄陽鄖陽二府鑄局八年准於各布政使駐劄之省城量留一局其

餘各鎮及湖廣之荊州等府鑄局俱停止十年復開密雲薊宣陽和臨清等鎮鑄局共增鑪三百零四座先是故明諸藩竊據邊省私鑄偽號奸民因乘便盜鑄而當草竊未定時民間雜用假銀及行使低銀物價迄無定準至是

詔令嚴行禁戢而偽錢假銀始不得行又定鑄錢務重一錢二分五釐錢背左鑄漢文一釐二字其戶部鑄戶字工部鑄工字各省及密雲等鎮並鑄開局地

方一字錢形字體備極精緻不合式者即為盜鑄
仍照舊例每千準銀一兩其現行舊錢厚薄不等
暫從民便直省錢法責成右布政使督查凡官鑪
夾帶私鑄者以枉法賊論十二年准戶部議於每
年二八月以局錢半成配給官俸兵餉其直省兵
餉官役俸工驛站雜支等項亦按季視錢局多寡
配銀給發是年開山東萊州府局十三年停福建
局復移陽和局於大同

按陽和地近大同明洪武築城其間景泰時置宣大

總督國初因之移大同府治於茲六年
並移鑄局至是裁宣大總督鑄局復移

十四年

戶部議直省征納錢糧銀錢並收以銀七錢三為
準銀則盡數起解錢留充用自是銀錢交納民間
便之時開鑪太多

詔令停止各省鼓鑄鑪座專歸京局較舊錢體質更加潤
厚每文重一錢四分磨鑄精緻錢面鑄順治通寶
四漢字錢模鑄寶泉寶源二滿字俟三年後新錢足
舊錢盡行銷燬乃定私鑄禁例凡為首及匠人擬

斬為從及知情買使者擬絞甲長知情不舉首者
照為首例其餘輕重有差又定攬和舊錢廢錢禁
例及各官失察處分十七年復開各省鼓鑄局定

錢模鑄地名兼用滿漢字

謹按是時定錢模地名
字如江南江寧府鑄寧

字江西鑄江字浙江鑄浙字福建鑄福字湖廣武
昌鑄昌字河南鑄河字山東鑄東字山西太原鑄

原字陝西鑄陝字密雲鑄密字薊鎮鑄薊字宣化
鑄宣字大同鑄同字臨清鑄臨字增置雲南鑄雲

字滿文在左漢文在右京局之寶泉寶源俱用滿
文前順治十年所鑄一釐錢模漢字地名惟江南
之江寧作江字江西之南昌作昌字湖廣之武昌
作武字餘俱與是年所鑄同其後至雍正元年始

定各省局錢帙皆用滿文至今通行蓋鑄年號以昭王制鑄國書以示同文洵為不刊之制

也十八年戶部以前議舊錢限三年後盡行銷毀至是期滿新錢鑄造尚少因請於一釐字錢暫令展限行使先收買十年以前無一釐字制錢每斤給直七分發局改鑄而御史余司仁亦言盜鑄私錢及明季之舊錢廢錢積聚民間不可勝數令禁止攬和行使而未講求收買之方法令雖嚴難以遽盡請於

京師並直隸各省地方設法收買俾民間無所行使
則挽和自息從之是年減大同局鑪座增入山西
省城局

康熙元年鑄康熙通寶輕重如舊制頒行天下乃
停各省鼓鑄止留江寧府局二年戶工二部以舊
議一釐字錢限二年行用至是期滿奏請各部撥
銀收買每斤給直六分發局改鑄三年復申定失
察私鑄之例自督撫司道各府州縣並吏目典史

及衛所官均有處分四年更定各官失察攬和舊錢廢錢處分六年復開各省鎮鼓鑄增置湖南江蘇甘肅三省局照式鑄地名滿漢文其錢幙湖南

鑄南字江蘇鑄蘇字甘肅鞏昌府局鑄鞏字

按湖廣左

右布政使舊駐武昌府康熙三年移右布政使於長沙府改為湖南布政使司江南右布政使舊駐江寧府順治十八年移右布政使於蘇州府康熙六年改為蘇州布政使司陝西左右布政使舊駐西安府康熙二年移右布政使於鞏昌府五年改為甘肅布政使司故特增鑄局

七年開

四川廣東廣西貴州四省鑄局錢幙滿漢文四川

鑄川字廣東鑄廣字廣西桂林府局鑄桂字貴州
鑄貴字九年四川巡撫張德地言四川僻處邊地
州縣本無存留錢糧而陸路有棧道之艱水路有
川江之險若銀錢並收則起解甚累現在無需錢
之用請停鼓鑄經戶部議准並江寧等十五布政
使鑄局均恐有需用非急之處

諭俱暫停嗣後各省局鎮局更迭存留惟視錢價低昂期
於流通初無定限是時錢制甚工費銅甚鉅銅價

浮於錢價因而奸民銷燬制錢造作銅器獲利以
倍御史羅人傑請定私銷制錢照私鑄例論罪官
吏失察亦如之尋以九卿議定民間市肆除紅銅
鍋及已成銅器與新造黃銅器在五斤以下者不
禁其餘不得濫行鑄造違禁者治罪十八年議戶
工二部俱令以滿右侍郎一員督理錢法又令戶
工二部都察院堂官同詣鑄局清查弊端十九年
開福建漳州府局錢帙鑄滿漢文章字二十一年

增置雲南大理府祿豐縣蒙自縣局錢模俱鑄雲

字二十二年

上以京局二部錢法向以本部右侍郎管理不無隱徇乃命選差詳察尋以吏部侍郎陳廷敬兵部侍郎阿蘭泰刑

部侍郎佛倫都察院左都御史馬世濟管理於是

佛倫言寶源局每月分二卯鼓鑄而各關解銅不

無遲延尾欠每年局銅僅可供鑄六月有餘餘月

匠役各歸鄉村不能保無私鑄請將各關稅及蘆

課銀增買銅斤一年按月鑄足二十四卯不令匠役出局可杜私鑄之弊陳廷敬又言錢日少而貴者蓋因奸宄不法毀錢作銅所致鼓鑄之數有限銷毀之途無窮欲除毀錢之弊求制錢之多莫如鑄稍輕之錢使燬錢為器既無厚利其弊自除於是定每文重一錢令寶泉局按卯增鑄其各省局俱照新定錢式二十三年定寶泉局每年額鑄四十卯二十四年增置雲南臨安府錢局錢幙亦鑄

雲字時福建巡撫金鉉請禁止舊錢

上以詢內閣諸臣內閣學士徐乾學言錢者歷代通行之
貨自漢五銖以來皆古今錢相兼行使以從民便
未有廢古而專用今錢者若隋時盡銷古錢明天
啟以後廣興鑄局盡括古錢以充廢銅此錢之變
也舊錢已盡即使良工更鑄而海內之廣一時難
遍

上採其言乃

論舊錢流布直省皆然若驟為禁止恐有不肖之徒借端生事貽害平民著永罷舊錢之禁二十五年增廣東肇慶府局錢模亦鑄廣字越明年停止二十六年戶工二部錢法停止選差專負仍令本部右侍郎督理二十八年開福建臺灣府鼓鑄局錢模鑄臺字二十九年復定收買私錢之令在京限六月交送戶部照銅價每斤給銀一錢在外以文到日為始亦限六月各州縣動庫銀照銅價收買解交布政

司三十三年令寶泉局每年開鑄三十六卯三十七年

上詣盛京謁

陵見民間私用小錢廢錢兩局錢行使絕少下廷臣確議
錢法事宜尋議定凡有職司地方之責者均有失
察私販私鑄處分三十八年議令民間自行銷毀
私錢交官收買四十一年大學士等會議制錢輕
小易於攬和錢宜改鑄每文重一錢四分三年之

內暫用舊錢小錢其新錢每串準銀一兩舊鑄小錢每串準銀七錢俟三年後通行銷毀四十五年以舊小錢展限搭用價直甚賤大錢壅滯令官為收買時山東長山縣多盜鑄者

特差侍郎恩丕等赴長山縣捕緝其私錢流行民間者令來年徵收山東錢糧銀一兩折錢二千俟私鑄盡而止四十七年嚴定失察私錢處分凡有私鑄及興販不法之徒地方文武官不行嚴緝一經發覺

知情者照私鑄為首例斬決家產入官不知情者
以溺職論官船戶有販運私錢押運官知情者與
同罪不知者亦以溺職論五十三年令寶源局每
年開鑄三十六卯五十五年令京局暫行收買舊
銅以充鼓鑄於是奸民私銷小制錢作廢銅變賣
較之錢價獲利以倍

諭令廷臣集議尋議錢局只許收買舊銅器皿不許買新
鑄板塊如有毀小制錢充作廢銅者通行八旗步

軍統領並五城大興宛平兩縣嚴緝分首從治罪
房主鄰佑知情不首者照為從例不知者勿論該
管官亦如之五十八年罷京局收買舊銅之令六
十一年將

京師平糶官米錢文交五城市易以平錢直並令八
旗月餉暫以銀錢各半配給嗣後每遇平糶率以
為例

雍正元年鑄雍正通寶錢頒行天下令寶泉局歲

鑄新錢與順治康熙大小制錢相兼行使又於大興宛平兩縣設立錢行官牙平直錢價時雲南各廠銅產日旺於是開雲南省城及臨安府大理府霑益州鼓鑄局錢幙滿文俱鑄寶雲字二年定寶源局每年亦開鑄四十卯三年申私錢之禁責令凡經紀鋪戶人等不許攬入私錢一文其從前收買在家者限一月內赴官首明官給半價收毀如逾限仍攬和行使不論錢數多寡俱發遣邊外給

披甲人為奴四年令寶源寶泉二局每年各鑄四十一卯又定寶泉局分設四廠鼓鑄增設大使各一員停雲南大理府霑益州鼓鑄增雲南省城及臨安府局鑪座其錢發運各省並准於鼓鑄正額外加帶鑄錢及外耗錢其發各省該督撫動藩庫錢一串易銀一兩交滇省解官領回如錢制輕薄不合式各督撫叅奏監局官交部議處時大學士九卿議言奸民銷毀制錢改鑄銅器從前立法甚

嚴而弊不能禁者緣定例時但定將來未造之器而已成之器不問又現在之器惟禁五斤以上而五斤以下不問故禁久玩生仍然銷毀鑄造也今欲杜毀錢之源惟是除紅白銅并黃銅之樂器天平法馬及五斤以下圓鏡不禁其餘俱不許黃銅制造其已成銅器作廢銅交官平買禁官吏不得扣剋則私毀可除於錢法實有裨益

上善其言遂下禁銅器之詔令下數月民間交官者少而

市店猶行貨賣復定例京城內除三品官以上其餘概不得用黃銅器限三年內將所有悉行報出當官收買旗人交本旗佐領漢人交五城御史處隨交隨收逾限不交者照私藏禁物律治罪其直省照京城例定限交收明年以向議三品以上許用黃銅猶覺過濫嗣後惟一品之家許用餘俱徧行禁止有藏匿私用者概以違禁論後復令各省有舊欠錢糧准其以黃銅器皿按成色斤兩抵算

其無舊欠之省分州縣民戶有交官者亦按成色給直地方官不得借捐買名色剋減價直重稱收買自是各省銅器俱陸續首出該督撫將所收銅斤奏請歸局開鑄五年開甘肅鼓鑄局錢模滿文鑄寶鞏字六年令寶源局增設新廠開鑄停甘肅寶鞏字鑄局七年增設寶源局大使二員令湖北湖南江西浙江河南山東山西各開鼓鑄局錢模滿文江西南昌府局鑄寶昌字浙江杭州府局鑄

寶浙字湖北武昌府局鑄寶武字湖南長沙府局
鑄寶南字河南開封府局鑄寶河字山東濟南府
局鑄寶濟字山西太原府局鑄寶晉字八年開貴
州畢節縣鑄局錢幙滿文鑄寶黔字九年開江蘇
鑄局於蘇州府開安徽鑄局於江寧府在江蘇者
錢幙滿文鑄寶蘇字在安徽者鑄寶安字按是時安徽布
政使駐劄江寧府城故鑄安字停河南山西局十年停江蘇局開
四川成都府鑄局錢幙滿文鑄寶川字十一年開

雲南東川府局錢幙亦鑄寶雲字停江西寶昌局
浙江寶浙局湖北寶武局湖南寶南局十二年停
安徽寶安鑄局議開雲南廣西州局鑄錢運京錢
幙亦鑄寶雲字時

上以錢重銅多易滋銷毀著照順治二年例每文重一錢
二分通行各省照式磨鑄精工其現行一錢四分
之錢聽一體行使嗣後寶泉局每卯用銅鉛十萬
二千八百五十七斤有奇鑄錢一萬二千四百九

十八串有奇寶源局視寶泉之半十三年定剪邊
錢禁例及各官失察處分

乾隆元年鑄乾隆通寶頒行天下戶部尚書海望
言鼓鑄日增而錢價昂貴建議者多籌禁銅之法
而奉行不良易滋弊竇夫銅器散布民間一旦禁
使勿用其情有所不便往往遷延而不交交納而
不盡緩之則互相觀望急之則百弊叢生胥吏借
此需索刁民借此訛詐得賄則賣官法不得則入

人罪搜括難盡用法不均民隱既難上達有司未必皆賢民間交納銅器竟有除去使費空手而歸者名為收銅實為勒取此等銅質本極粗雜加以銹壞經錢局鎔化折耗甚多而工價不減所得不償所失於鼓鑄全無裨益況黃銅乃用紅銅白鉛配成今禁黃銅而不禁紅銅是較未禁之先銅又多費適以速其私毀是故未禁黃銅之先白銅甚少既禁黃銅之後白銅甚多皆奸匠銷毀制錢和

藥水煮白成器其弊如此夫自古錢文重輕必隨銅價之低昂而增減之上年

世宗憲皇帝因私銷之弊議減錢分重一錢二分所以調劑夫銅貴錢重者已有成效固不必屑屑於禁銅之末務矣

上善其言乃停止收銅之令二年出工部節慎庫存留餘錢八萬串於京城設官局十處出易以平錢直嗣後各省錢價昂貴之時亦設官局以所鑄餘錢

易換俟價平即止

是時京城每紋銀一兩只換錢八百故有是議未幾錢價復平

即停止

三年停山東局及雲南廣西府局五年浙

官局

江布政使張若震見私毀之弊屢禁不能杜絕訪諸鑪匠皆言配合銅鉛加入點錫即成青錢奸民即使銷毀不能成器目請飭戶工二局改鑄黃錢為青錢與現在黃錢相兼行使并令開局各省照式改鑄是年復開江蘇浙江局又開福建局錢帙鑄滿文寶福字六年開雲南東川府局復開湖南

局七年令寶泉寶源二局每年各開鑄六十一卯
遇閏月加鑄四卯又開廣西局於桂林府錢模鑄
滿文寶桂字復開江西局時江南鑄局用銀一兩
祇鑄錢八百九十六文每歲配給餉錢以八百八
十錢折銀一兩餘錢十六文充錢局及運腳公費
八年

上以兵丁月餉僅敷食用著照定例每一兩給錢一千
其錢局運腳准銷公項並飭各省鼓鑄有折扣者

悲如江南例是年復開雲南大理府局九年復于
京城設官錢局令寶源寶泉二局於正額六十卯
外各加鑄十卯明年復令二局各帶鑄五卯加鑄
二十卯並交官局易換尋以錢價漸減將官局停
止兩局仍照原額為六十一卯又開廣東省鑄局
於廣州府錢幙滿文鑄寶廣字開直隸保定府鑄
局錢幙鑄寶直字十三年復開山西局開陝西西
安府局錢幙鑄寶陝字十五年復開雲南廣西府

局十六年增定寶泉寶源二局每年各開鑄七十
一卯歲添錢十六萬九千八百餘串遇錢價昂貴
即發八旗米局減價出易是時

上巡幸江浙商民雲集乃先期

命截留滇銅于江蘇浙江二局加卯開鑄屆期設立官
局減價出易以平市直嗣後恭遇

南巡盛典照以為例二十二年

諭前代廢錢流傳今已無幾若盡行查禁吏役轉得借

端滋擾如唐宋元明之舊錢仍聽民便至偽號錢文
例當嚴禁該督撫出示曉諭准民間檢出官為收換
二十四年移貴州畢節縣局於省城二十五年

令寶泉局每年開鑄七十六卯先是二十四年因平定
回疆甘肅經理一應屯田事宜需錢甚夥乃增四
川湖廣錢局按數分運協濟尋議開西域葉爾羌
城鼓鑄局回部之葉爾羌喀什噶爾和闐城舊有
錢文名曰普爾以紅銅為之重二錢制小而厚輪

郭外周而中無方孔每五十錢當銀一兩謂之騰格至是蕩平式廓

上從將軍兆惠所請

令戶部頒制錢式仍用紅銅每文亦重二錢陽模鑄漢字文曰乾隆通寶陰模鑄葉爾羌城名左

國書右回字先以預脩軍營之銅開鑄五十萬貫易回部舊錢銷毀其後于本疆各城產銅之地陸續採取至二十六年又開阿克蘇城鼓鑄局亦如葉

爾羌之制惟錢幙鑄阿克蘇城名其銅設七品伯克管理回部於該地開採二十九年開雲南順寧府鑄局錢幙仍鑄寶雲字三十年議准四川重慶夔州二營生息銀兩交寶川局每年加鑄二卯三十一年又以雲南總督劉瀚請減雲南順寧府加卯鼓鑄增省城臨安鼓鑄卯期尋以銅斤不敷將東川新設鑪二十五座大理廣西各十五座臨安順寧各八座暫為裁減先是晉省鼓鑄自乾隆十

四年安鑪十座十八年減去四座二十三年復添鑪五座錢價日賤至三十六年撫臣請酌減從前加增五鑪以疏錢法從之是年又以江西巡撫海明奏減去寶昌局鑪四座仍照舊六鑪鼓鑄以乾隆壬辰年為始四十年開伊犁鼓鑄局錢帙用寶伊字伊犁為準部總匯之區乾隆二十年

王師平定遂隸版圖既有重兵駐守兼多商販貿易需用錢文較葉爾羌更為緊要是年遂令開鼓鑄局

四十一年以雲南銅斤足數加鑄復定東川局增鑪十五座曲靖府安鑪十八座廣西州復鑪十五座保山局增鑪四座大理局增鑪三座省局五十鑪之外復添一座統成一百四十一鑪除東川局二十五鑪先經加卯帶鑄外餘俱令每鑪於正鑄外一律加鑄三十六卯半又令貴州寶黔局復鑪鼓鑄四十四年以滇省銅斤不敷各省採買裁減大理局鑪一座省局五座移設大理廣西局裁

去四座將東川局二十鑪內減去四座移設廣西
各加鑄半卯其臨安保山曲靖三局復設十三座
盡數裁去惟東川府需錢較多仍令照舊鼓鑄又
減廣西省鑄局及湖北寶武局鑪座四十六年又
以四川銅斤不敷將寶川局再停十二卯五十年
定各省錢局交代之例凡藩臬及道員經營者於
新舊交卸時俱著前往造冊移交新任並具結造
報巡撫倘有款項未清即將前任經營之員叅處

以專責成

皇朝通志卷八十九

欽定四庫全書

皇朝通志卷九十

食貨畧

十

關榷

雜稅附

臣等謹案古者川澤林藪各有專司原以崇本抑末而非與閭閻爭尺寸之利也乃唐宋以來視為利藪搜索靡遺凡竹木間架坊場撲買莫不有征而取民之制蕩然無存矣我

國家肇造區夏蕩滌繁苛

列聖相承如傷厯念雖惟正之供猶時加裁革況一切稅額之增減更何足論是故設關口則勒扣必嚴定牙行則胥役有禁或開茶礦以便閭閻或嚴契稅以杜爭佔其隨宜酌取者類皆量地制宜務從節簡祛弊累而立經常誠億萬世樂利無疆之源也茲纂通志依例登載而附以雜稅以彰昭代盡美盡善之政焉

順治元年豁免明季各項稅課虧欠免各直省關
津抽稅一年禁革明末加增稅額銀兩二年定蕪
湖杭關龍江荊州清口五處稅銀差工部官抽分
三年革明季加增太平府姑溪橋米稅金柱山商
稅安慶府鹽稅四年歸併荆關通惠河中河清口
廠杭關蕪湖龍江等關於戶部六年

諭戶部行文各關滿漢官員以後俱照原定則例起稅如
徇情權貴放免船隻乃於商船增收或希充私橐例外

多徵以病商民者一經查出定行重處八年定各關專
差漢官每關一人例九年併西新關江寧倉為一
差停獨石口差嚴關差留用保家委官之禁凡額
設巡攔各製號衣腰牌十年令各關差刊示定例
設櫃征收不得勒扣火耗及陋規並禁關役包攬
報單十一年給事中杜篤祐條奏清釐關弊四事
一裁吏役一查稅累一關差迴避原籍一批文核
對限期從之十二年定各關兼差戶部滿漢官筆

帖式例十三年定各關專差漢官兩翼差筆帖式
張家口殺虎口各差滿官一人筆帖式一人均照
例一年更代

康熙元年停蒙古漢軍關差定六部各咨送滿漢
官筆帖式各一人輪掣例又定張家口殺虎口專
差滿洲蒙古官例二年定盤詰糧船關口地方止
於儀徵瓜州淮安濟寧天津五處並許帶土宜六
十石以恤運丁又定外國人攜帶貨物入崇文門

免稅例申定滿漢關差例

滿官差郎中員外郎漢官差郎中

又更

定兩翼張家口殺虎口准輪差六部司官例四年

罷抽稅溢額議叙之例五年定淮安關及直省各

關稅務俱委專員管理定杭州府同知管理北新

南新兩關事務七年定浙江鹽政管理北新關事

務二十一年移九江關駐湖口二十三年設福建

廣東海稅監督

滿漢各一人筆帖式一人

又准沿海地方載五

百石以下船出海貿易登載人數給印票驗放其

進海口內橋津地方貿易舟車等物免稅又議福

建沿海無蓬漁船稅仍聽地方官征收其有蓬桅

船歸監督征收梁頭稅課沿海要口均撥哨船兵

役巡察設江南浙江海稅監督

滿漢各一人
筆帖式一人

設西

新龍江課稅專官二十四年免外國貢船抽稅二

十五年定州縣官隱匿海口船處分

五船至十船
者罰俸十五

船至三十船者分別降調五十船
以上者革職仍治以隱匿之罪 二十八年

諭採捕魚蝦船及民間日用之物并餬口貿易悉免其收

稅嗣後海關著各差一人又以朦朧歸海關輒東歸淮

關管理沙溝免稅

謹按沙溝係朦朧輒東總匯海關有稅故沙溝不設以二處分

隸之三十三年設立山海關差官管稅三十四年設

浙海關署於寧波府撥沿海巡哨船二十於各口

巡察又設海關署於定海縣並設紅毛館令監督

往來巡視嚴差官自京私帶年滿舊役謀佔總科

庫頭名色之禁四十六年議准山海關外金州牛

莊等處交與監督巡察越關漏稅所得贏餘作為

定額五十四年議准九官臺清河松嶺子等處交
山海關監督巡察收稅增課銀三千兩五十五年
北新鳳陽天津三關監督題報關額

諭俟監督任滿交巡撫監收

臨清關亦
如此例

停瓜州稅課裁稅

課大使五十八年議准淮關稅務於兩河同知內
差一人管理又議准福建糖船至廈門者赴本關
納稅其往浙江江南貿易者免稅五十九年以江
海關歸江寧巡撫浙江關歸浙江巡撫管理又令

橫城口稅歸山海關兼管增稅千兩作為定額

雍正元年復移湖口權關於九江並分設口岸於

大孤塘二年

諭嗣後稅務交與地方官監收於錢糧地方均有裨益

至是

各關差官俱停止惟崇文門無地方官可交仍差內務府官山海關左右兩翼古北口潘桃口殺虎口呼納呼河差仍照例差遣部員又

諭凡商賈貿易之人往來關津宜加恩恤故將關差歸之巡撫以巡撫為封疆大吏必能仰承德意加惠商旅也

但各關皆有遠處口岸所委看管家人難免額外苛求及索取飯錢等弊嗣後著將應上稅課之貨物遵照條例刊刻詳單均給各貨店其關上條例木榜務豎立街市使人共見申禁關役報單不實之弊嚴放關遲滯之禁又覆准淮安關仍差部員蒞墅關交蘇州織造管理又更定鳳凰城中江稅務在

盛京五部司員內遴選派往例

向係城守尉等官管理

乾隆元年革除龍江西新關衙規驗票等項銀兩

諭聞外洋紅毛夾版船到廣時泊於黃埔地方起其所帶礮位然後交易竣給還至輸稅之法每船按梁頭徵銀二千兩左右再照例徵其貨物之稅此向來之例也乃近來夷人所帶之礮聽其安放船中而於額稅外將所攜置貨見銀別征加一之稅名曰鰲送亦與舊例不符因思從前洋船到廣既有起礮之例此時仍當遵行何得改易至於加增鰲送稅銀尤非加惠遠人之意著察照舊例按數裁減又定江西

九江贛州關鈔課三聯單例凡商人納銀入櫃後
發給一聯一存稅署一交巡撫衙門又准張家口

居庸關照崇文門例車駄貨物過稅收取飯錢以

資養贍

二關向無火耗

二年定米穀稅例倘地方偶遇旱

澇米穀船到准其放行竣成熟再如舊例徵收

又嗣

議准驗明實係販往歉收地方者免稅放行仍給
印照至歉收處關口驗明填注到關日月鈐印發
票回關再驗如回船載有
他貨止徵貨稅仍免船料
免天津臨清二關糧稅

船料四年

諭上年江安兩省歲旱歉收朕蠲賑兼施多方籌畫並令豁免米糧賦稅俾商販流通源源接濟於地方甚有裨益續經該督奏請將淮安揚州潁野鳳陽等關免徵米稅俟乾隆四年麥熟時停止朕允其請今屆麥熟之期聞各屬雨澤尚有未曾霑足之處且上歲歉收之後米價一時未能平減若商販稀至仍恐民食艱難著將上下江各關口米稅照舊免征俟本年九月米穀盛行之時再行征收又議准各關贏餘銀

如與上年懸殊者令將地方情形察覆據實申明
又定黃豆非麥稈可比雖遇歉年不准免稅例又
定出海樵採船每船准帶食鍋一每名止許攜斧
一人數不得過十例定兩淮鹽政管理揚州各稅
務又定蕪湖鳳陽關稅務專差管理五年定山東
博坂關稅務歸併臨清關管理嚴申捏名討關之
禁六年定凡領帑及採辦銅錫鉛經過關口察驗
文批數目相符者立即放行例

應納船料關口
仍征船料

七年

復設德州魏家灣尖塚樊厰等口岸

臨清關所屬

九年

定福建如遇歉收之年委官購買海運接濟不得
招商運販例十年定臺灣商漁船撥運米石例每
船只許帶食米六十石於出鹿耳門之先查驗多
者分別責懲十一年定各關任滿具題銀冊到部
日期例又定各關征收贏餘較上年短少有埃督
撫察覈覆奏者以奉

旨之日為始扣限四月覆奏又崇文門左右兩翼張家

口山海關等處限任滿三月後將冊籍送部移科
磨對十二年移福建詔安縣溪雅稅館於懸鐘地
方

諭昨工部具奏蕪湖關贏餘較去年短少行令察覈今
日戶部議稱蕪湖戶關贏餘較去年有餘毋庸置議
等語此案工關贏餘雖較上屆不足其戶關較上年
贏餘之數足數抵補工部再行察核之處不必行嗣
後如一人而兼兩關其比較上年贏餘之處均有不

足再令該督撫據實察核十四年定贏餘短少處分

例凡一分以上至三分者罰俸有差四分五分者

分別降級調用二十二年增定閩海關稅則

向外洋

番船俱由廣東收稅其至寧波者不過十之一二故閩海稅則較輕於粵海市舶易於規避至是更

定

二十五年兩廣總督李侍堯疏請革除粵海關

規禮銀悉歸公造報從之二十七年江蘇巡撫陳

宏謀疏言蕪湖關四弊奏請革除一禁鋪戶代客

完稅包攬居奇仍令商人按簿親填一貨船抵關

簽驗納稅給票後始准過關以杜偷透一關員遴
選佐雜照例半年更替不得再留一督撫與監督
本相助為理每月所征數目監督按月先行知會
督撫再於年滿奏報時統咨知會從之三十四年
諭自來硫磺出入海口俱有例禁原因磺勦係火藥所
需不便令其私販但海外硫磺運至內地並無干碍
嗣後於海船出口時切實禁止不許偷帶磺勦其各
省洋船入口禁止壓帶硫磺之例概行停止著為令

四十二年定打箭鑪稅差照山海等關之例於宗人府正副理事官及各部院郎中員外等官內揀選保送又

諭戶部奏查揚關征收稅銀較雍正十三年短少三萬三千六百餘兩請著落經管之道員孫枯賠補一摺因命軍機大臣交戶部查該關歷年盈餘之數較雍正十三年多寡若何今閱單開各年盈餘數目惟乾隆十四十七兩年較雍正十三年有盈無絀其餘各

年節次短少並非始自近年各關稅課盈餘例與上
屆相比較朕御極之初本不知各處所收關稅多寡
之數因諭部臣即以雍正十三年為準使胥吏不敢
例外苛求監督不能征多報少且使每年比較不致
歲漸加增加減無所底止實於體恤商民之中寓司
關稅不致作弊尅減之意並非因雍正十三年關稅
獨多使各關稅必足其數也乃行之未久部臣因各
關奏報盈餘較雍正十三年有盈者居多若置上屆

於不問恐監督以比舊已多即可從中侵隱易滋流弊請仍與上屆相比較又復通行日久昨歲考核准關鳳陽關較上屆屢形短絀因令復照雍正十三年比較則所短之數更多自係辦理不善今揚關亦復節年短少且通計短少最甚者惟此三關若因此而遍及諸關未免窒礙且恐無識之徒疑朕於關稅必欲從其多者相核實不知朕體恤商民之本意矣朕有意於帑項增多則不三次通免天下錢糧其所增

並不較此百倍乎又思乾隆二十八年臨清關征收
盈餘較二十七年短少朕曾諭戶部令與二十五六
兩年再行比較嗣經部臣奏稱該關盈餘之數雖較
上屆少銀三萬餘兩而較之二十五六兩年尚多銀
一萬五千餘兩即予免議蓋稅課盈縮率由於年歲
豐歉固難免參差不齊而通計三年即可得其大槩
若多寡不甚懸殊原可無庸過於拘泥此法最為平
允嗣後各關征收盈餘數目較上屆短少者著與再

上兩年復行比較如能較前無缺即可核准若比上
三兩年均有短少再責令管關之員賠補彼亦無辭
夫朕以雍正十三年為準者本屬美意今既有此求
全之毀嗣後此例不必行所有揚關本年比較盈餘
交該部照此例另行核擬具奏並將此通諭知之四
十五年定荆關打箭鑪兩處徵收稅務交該督撫
照臨清等關之例派委妥員管理

向例俱派部院
司員前往管理

一年報
滿更換四十九年免粵海關珍珠寶石等稅

雜稅附

茶法

坑冶

稅契

行帖

雜征

茶法

順治三年免茶馬增解額數二千匹其應解之數

仍以舊額一萬一千八匹為準七年准茶馬御史

吳達疏令部發之引俱照大引例官商平分以為

中馬之用

先是陝西茶馬御史印發引有大小之分又有大引官商平分小引納稅三分

入官七分給商之例

十八年准達賴喇嘛及根都台吉於北

勝州互市以馬易茶

康熙三十四年刑科給事中裴元佩疏言馬政事
關緊要洮岷諸處額茶三十餘萬筥可中馬萬匹
陳茶每年帶銷又可中馬數萬匹茶觔中馬甚有
裨益於是遣專官管理茶馬事務四十四年以中
馬無幾停止巡視茶馬官歸甘肅巡撫兼管其西
寧等處所征茶筥仍變價充餉

雍正八年以川茶課稅向以園樹多寡為額未有
定准定改照觔兩征收又定陝西茶商每引一道

運茶百觔准加耗茶一十四觔如有夾帶照私鹽
例治罪官吏失察亦如之九年定五司復行中馬
之法每上馬一匹給十二籠中馬九籠下馬七籠
計所收馬匹留為甘省軍營之用其有盈餘分撥

河南山西牧養

按川省茶司原分隸五處西司坐落西寧府洮司坐落岷州河司坐

落河州莊司坐落平番縣甘司坐落蘭州府

十年四川巡撫憲德疏言

川茶半由蒙古西藏及打箭鑪番人販售自引歸
部發遇番客雲集分給不敷請預頒茶引五千張

貯川省巡撫衙門隨時增發從之十三年停止五
司以茶中馬定嗣後甘庫茶篋遇存積過多之時
改征折色俟各司銷存無幾復征本色

乾隆六年減川省成都彭灌三縣積引四千四十
餘張並除課銀二千四百餘兩八年豁免川省成
都彭灌三縣逋欠茶課二十四年甘肅巡撫吳達
善以甘省五司自乾隆七年改征本色以來茶引
日積惟莊甘二司地係衝衢西河二司附近青海

猶可行銷洮司最僻甚難銷售請將各庫官茶搭給內地及新疆兵營俸餉又請將洮司額引歸併甘莊二司征課俟洮司庫貯茶封搭給餉完日即

行裁汰從之

嗣於二十七年並河司裁汰統歸甘莊二司頒引征課

三十七

年准四川總督阿爾泰請增南川縣茶腹引一百張照例征收稅課三十八年定四川三雜谷等處土司買茶以千觔為率使僅敷自食不能私行轉售從川督劉秉恬請也

坑冶

順治元年開採山東臨朐招遠等處銀礦

後於八年停止

康熙元年定貴州開州斗甫廠征水銀額每歲九

十五觔閏加十觔變價撥充本省兵餉二年令四

川黎漢紅卜荳二洞白銅舊廠聽民開採輸稅九

年定貴州黔西州屬新開黃土坎廠徵水銀百觔

十五年遣官監視山西應州邊耀山煎煉礦銀十

七年嚴私開硝磺硫磺之禁十九年定各省開採

所得金銀四分解部六分抵還工本例又試採陝

西臨潼山東萊陽等銀礦又令浙江富陽等縣聽

民採取銅鉛輸稅

二十年停止

二十一年定雲南銀礦

官收四分給民六分例二十二年停止山東山西

開採二十四年招民開採四川邛州蒲江縣黃鐵

山鐵礦六座官收十之二

按四川自是年起至二十五年止共收稅鐵萬

一千六百餘觔每觔照時價二分變賣

三十八年開州用砂斗甫二

廠山頽砂盡改於修文縣紅白巖開採四十三年

諭聞開採之事甚無益於地方嗣後有請開採者悉不准行四十九年開採雲南昆陽州子母廠易門縣寨子山

廠銅礦五十年令封閉湖南產鉛諸山

時以湖南山深谷邃

境通黔粵苗獍雜處不便開採五十七年並停止四川各廠

五十一年奏准開

採雲南大姚縣惠隆銀廠五十二年定湖南郴州

黑鉛礦取出銀母官收半稅例五十三年令雲南

惠隆廠照郴州例收稅五十七年定雲南楚雄府

石羊等廠臨安府箇舊等廠徵收不足照地丁雜

項銀例議處開採雲南金龍銀廠又定貴州威寧

府屬猴子廠銀礦二八收課例

六年
停止

五十八年令

雲南建水縣屬華祝箐廠雲南縣屬水木支山金

龍廠照惠隆廠例收稅五十九年定貴州威寧府

觀音山銀鉛礦廠二八收課例六十年停採雲南

華祝箐廠

雍正元年開採雲南馬腊底銀廠停採貴州觀音

山等廠又定雲南廠課造冊題報限期將元年正

月起至十二月止徵收稅項於二年五月內冊報
後著為例三年開採雲南古學銀廠五年開採雲
南黃泥坡並貴州威寧府屬白蠟柞子三廠六年
定湖南靖州屬之墓坪山金砂課例每淨金一兩
收課四錢以五分作解供耗費及官役養廉以三
錢五分作商民工本定廣西蒼梧縣屬芋莢山金
砂課例每兩收課二錢
後於九年停採定廣西臨桂縣屬之水槽
野雞二礦所出銀鉛銅砂二八收課例七年開採

貴州畢節縣大雞倭鉛廠威寧府採木果銅礦八
年令四川建昌所屬之迤北興隆寧番之紫古喇

沙基九龍五廠招別省商人開採

本省商人
不善開礦

所出

銅觔三分收課更定雲南羅平州之界浙塊澤二

廠二八收課例每百觔收課十觔又定貴州大定

府開採硃砂雄黃二八征收例其廣西恩城土州

硃砂廠亦如之開採廣西南寧府果化土州雄黃

十年開採雲南阿發銀廠又以貴州大定府格得

為正廠八地為子廠十一年定廣西賀縣螞蚋山
銀礦每兩收課三錢例十三年

諭廣東近年以來年穀順成地方寧謐與從前風景迥異
今若舉行開採之事不免聚集多人其中良頑不一恐
為閭閻之擾累況現在勸民開墾彼謀生務本之良民
正可用力於南畝何必為此僥倖貪得之計以長喧囂
爭訟之風著行停止又停採湖南郴州九架夾黑白銀
鉛各礦

乾隆二年停採廣西懷集縣汶塘山臨桂縣之水
槽野雞等廠又停採思城土州硃砂三年廣西賀
縣之螞蚱銀礦礮深砂簿准其封閉又申定礦廠
事宜例凡係產銅山礦令地方官辨明砂色實有
裨於鼓鑄始准結報開採其金銀礦悉行封閉至
黑鉛卽係銀母亦嚴禁朦混開採募招各商設總
副名目使本地殷實良民承充禁外省游民冒報
所收銅鉛照二八收課外所餘者每百觔別收銀

三釐加收銅鉛三觔以備折耗及官役養廉之用
五年貴州威寧府白蠟銀礦開採年久洞老山空
廣西蒼梧縣金盤嶺金礦砂薄荔枝山銀礦礮淺
沙竭均行封閉又停採果化土州雄黃又開廣東
錫山即令銅商分任採辦每錫百觔亦照例二八
征收八年覆准貴州天柱縣相公塘東海洞等處
金礦均屬曠野無干民田廬舍照例開採每金一
兩收課三錢九年定廣東開採銅鉛銀砂等礦並

招商民承採事宜例凡有礦之處令地方官覈實
無碍民田廬舍確有成效再行招商開採仍照定
例二八徵收各廠該管道員發給地方官循環流
水簿連五串票將每日所出之數填註流水簿分載
串票一繳道署一存地方官署稽察一付商人
存照其串根並流水簿一月一繳道署察覈仍十
日一次申報督撫司道等官稽考按月造具支銷
公費各冊申報道署按季分報督撫及該有司衙

門按日所採礦砂挨次堆貯如某日煎煉某礶某
日礦砂若干勛鑪頭報明官商督同煎煉分別銅
鉛金銀分記塊數勛兩註冊登填串票至所有礦
山惟於連界處許一商兼承其隔遠不相連者每
山只許一商承充使在山工丁便於管束倘資本
無幾者仍聽合夥同充至承充之人先令將本銀
呈該管道覈實

或二千或三千不拘定
數以足數支用為度

移貯該州

縣庫發領承充之時由布政司給與印照赴山開

採如礦少砂微之處不能容商者聽附近民人報
採照例收課又議准金銀二礦於鼓鑄無涉悉行
停採其銅鉛礦有夾帶金砂銀屑者仍照原定章
程開採封閉雲南大姚縣惠隆金龍等銀廠貴州
天柱縣相公塘東海洞金礦廣東海陽縣水尾白
墳坳豐順縣李村灣風吹礫陽春縣莫村那軟瓦
盞等礦十年增貴州各廠官買餘鉛價

向例餘鉛
百觔給鑪

民一兩三錢
今增二錢

又定廣西平樂府恭城縣鉛礦內所

出蜜陀僧課例

每百觔收正課二
十觔散三觔

十一年增廣西

收買餘銅價

向例每餘銅百觔給價
八兩三錢今增十三兩

俟充裕之日

將餘銅收買一半餘給商自行銷售十二年開採

貴州威寧州大化里新寨等處銀鉛礦砂每煎銀

一兩收課四錢又移廣西鎮安府天寶縣孟村淥

礦於那坡山開礦十四年封閉貴州新寨銀鉛礦

雲南阿發銀廠十五年定征收浙江爐坑課例坑

課三則上則徵銀一兩六錢中一兩二錢下八錢

鑪餉二則上則六錢下則三錢又每坑歲納銀四

錢以為疏濬洗鐵諸溪河淤塞之費

十七年又以永嘉平陽泰

順產鐵無多改歸下則征收豁除濬河銀

契稅

順治四年定凡買田地房屋增用契尾每兩輸銀

三分

康熙十六年增定江南浙江湖廣各府契稅

每歲蘇松

常州四府大縣六百兩小縣二百兩安徽等十府州分別大小自五百兩至百兩不等揚州府照賦

役全書額徵淮安府屬州縣無定額儘收儘解杭
嘉湖寧紹金嚴七府大縣三百兩中縣二百兩小
縣百兩湖北大縣百五十兩中縣
百兩小縣五十兩僻小州縣十兩

十七年增定山

東等省契稅

大縣百八十兩至二百四十兩中縣
百二十兩小縣六十五兩至三十五

兩

二十年增定浙江台衢溫處四府契稅

大縣百
兩中縣

六十兩小
縣三十兩

三十一年增定江西等縣契稅照浙江

台衢等縣例

雍正七年准契稅於額征外每兩加征一分以為

科場經費

乾隆十二年定民間置買田房令布政使司頒契
尾格式於州縣編列號數前半幅備書業戶姓名
買賣業產數目價銀稅銀若干後半幅於空白處
預鈐司印以備投時將契價稅銀數目填寫鈐印
之處令業戶當面截開前幅給與業戶後幅同李
冊彙送布政司查核以杜衙門停攔胥吏改換之
弊

行帖

康熙三年定當舖每年征銀五兩大興宛平大行
店鋪同十五年京城行鋪稅例上等每年五兩中
二兩五錢四十八年御史張蓮言凡市集設立牙
行例給官帖使平物價乃地方土棍於瓜果菜蔬
細物亦私立牙行名色勒捐商民請除應立牙行
一切私設盡數革除從之

雍正六年設典當舖行帖十一年

諭各省商牙雜稅固有闕國課亦所以便民是以各省額

設牙帖皆由藩司頒發不許州縣濫給所以杜增添之弊近聞各省歲有加增即如各集場中有雜貨小販無藉牙行者今概給牙帖抽分利息是多一牙戶即商民多一苦累況牙帖納稅每歲無多徒滋繁擾甚非平價通商之本意著各省藩司因地制宜著為定額報部存案不許有司任意加增嗣後止將額內各牙退帖頂補換給新帖再有新開集場應設牙行者酌定名數給發亦報部存案如此則貿易小民可永免牙戶苛索之弊

雜征

順治元年定牲畜每兩三分收稅例二年革陝西
落地稅銀

康熙三十二年豁除江南邳州雜課額稅闕額銀

嗣後不限定額儘收儘解

四十八年定四川水碾水磨課銀之

例

雍正十三年

諭聞各省地方於關稅雜稅外更有落地稅之名凡攫鋤

箕帚薪炭魚蝦蔬果之屬其直無幾必察明上稅方許
交易且販自東市既已納課貨於西市又復重征至於
鄉村僻遠之地或差胥役徵收或令牙行總繳交官甚
微不過飽奸胥之私橐而細民已重受其擾矣著各省
凡鄉村鎮落落地稅全行禁革

乾隆元年令甘肅商畜二稅刊示條款畫一征收
申定原額牙行歇業即行開除例凡不願承充者
不必俟頂補有人方行退帖除浙江角里等處各

口界扯商稅又豁除廣東歸善海豐惠來潮陽四縣加增魚課銀六千兩有奇二年裁雲南鎮雄州

鹽稅

鎮雄係食川鹽業已征稅故裁

革山東魚筏稅四年申新開

集場濫給牙帖之禁五年嚴衙役捏充牙行之禁
亦年豁除直隸大陸澤水泊漁課

皇朝通志卷九十

欽定四庫全書

史部

皇朝通志卷九十六

編修臣錢樾覆勘

總校官編修臣倉聖脉

欽定四庫全書

皇朝通志卷九十一

食貨志

鹽法

等謹按鹽法之行由來已舊

列聖相承蕩滌繁苛俾民樂利立法之良固前朝所不及

惠政之加亦亘古所未聞如加斤改引蠲逋提綱
緝梟禁漏減價平直皆為裕商益民計也至竈戶

場丁則減額課借息銀老幼孤獨則弛厲禁准販
負而一切設官分職莫不盡美盡善此豈漢唐以
來除富商為吏使利歸於上者所可及耶至於鄭
志所載鹽鐵使筦鹽及鐵與茶類為一編蓋以三
者之賦當時專設一官總司征榷故從類紀而我
朝鐵冶之產久無征榷茶唯甘肅陝西尚有茶課他
省並無專司與歷代沿革互異自不得仍因其舊
茲纂通志謹將鹽法列為一編而於茶鐵則附見

征權雜稅編茲無贅焉

順治元年詹事府通事舍人王國佐疏定長蘆鹽
法十四事一復額引以疏壅滯一改引部以速引
利一便引價以壯京圉一革防銷以省商費一除
濫贖以伸商冤一除變價以止姦欺一清焚匿以
杜虛冒一止改引以一引鹽一疏關禁以通引楫
一杜擾害以清私販一核場竈以清窩囤一復兩
坵以備譏察一免徭助以濟孤商一設賞例以鼓

富商從之二年

諭各運司鹽法明末遞年加增有新餉練餉及雜項加派等銀著盡行蠲免仍免本年額課三分之一四月又免陝西鹽課三分之二河東巡鹽御史劉今尹以河東向例先納銀後領引商力不敷請循按引納課之例從之又准劉今尹請山西太原府遼沁州亦照河東例改票行引又准劉今尹請原食淮鹽之汝寧歸兩淮巡鹽御史管理原食西和漳縣鹽

之臨洮鞏昌歸甘肅巡按管理是年

諭河南江南等處鹽課照前朝會計錄原額征解四年免
江南崇明縣鹽課定山西鹽法道歸鹽運司兼管
七年定廣西驛鹽事務歸布政司兼管八年定徵
解額課不許分外勒索十二年禁河東長蘆等處
派民納課積弊十七年嚴回空糧船夾帶私鹽之
禁四川巡按張所志請新鑿鹽井照開荒例三年
起課其貧民藉鹽易食自四十斤以上者始納課

從之十八年復免崇明縣鹽課

康熙元年以淮北引滯改撥寧國府六千五百引
和州含山三千五百引每年奏銷以為定額三年
免廣東逋欠課銀七萬一千一百餘兩是年以江
西吉安府向食粵鹽距粵場千餘里兼有灘磧之
險改食淮鹽四年

詔免鹽課歷年逋欠

時因蠲免直省舊欠錢糧推廣及之

以東省早免額征

竈課銀一萬四千八百餘兩定湖南衡永寶三府

改食淮鹽又定郴州等十一州縣食鹽免其銷引
辦課七年定廣西布政司兼理鹽務改廣東巡海
道為廣肇道兼管鹽法九年巡鹽御史席特納疏
言兩淮鹽務之苦有六有輸納之苦有過橋之苦
有過所之苦有開江之苦有關津之苦有口岸之
苦又有分掣三大弊一為加鈞之弊二為坐斤之
弊三為做斤改斤之弊經部議嚴禁勒石立於橋
所及經過關津岸口永行禁止又停止兩淮預征

之例十二年仍令御史巡視兩淮兩浙長蘆河東

鹽務

謹按順治二年巡視各處鹽政差監察御史各一員歲一更代十年裁巡按遂議並停巡

鹽御史以鹽務事交運司管理

十三年添設江南安徽驛鹽道其

管理通省驛道改為江蘇驛鹽道添設四川督糧

道湖北驛傳道俱兼理鹽務十四年改陝西固原

道為平慶道管理驛鹽十七年刊刻竈戶由單令

地丁錢糧照民戶地丁例十八年免福建逋課二

十年停止

盛京銷引聽民人自行煎煮販賣二十一年除廣東

各渡口鹽埠額外加增銀六萬五千餘兩二十五

年定江西南贛二府仍食粵鹽

南贛二府舊食粵鹽康熙十七年改

行淮鹽至是仍如舊例二十七年廣東巡撫朱宏請清釐粵

省鹽政諸弊從之

一禁止課外私派一定商人公

者即行飭革另募一各州縣銷引有官引難銷有

官引不敷者應酌量增減一土豪謀充卡商踞地

為害嚴加禁止一紫要津口應擇佐貳廉幹之員

駐守盤查一鹽有生熟民間嗜好不一應隨商掣

運隨民買食一省城距佛山僅三十里省城掣定

之鹽行至佛山應免其復掣一鹽價以水陸運費

之多寡定其低昂其挽和沙土諸獎一併嚴禁

二十八年豁免河東本年

額征鹽池地租及長蘆新增引課又豁免雲南黑井鹽課二十九年定直隸宣化府屬聽民自煎食鹽照舊額完課三十二年改廣東驛鹽道為運司裁提舉司改設運同駐劄潮州其廣惠二屬之歸德淡水等場設立分司催徵巡緝三十八年

詔減兩淮額課二十萬兩又減浙江鹽課加征銀三萬一千三百兩四十二年江南總督阿山言淮鹽陋規

有鹽政差滿餽送有鹽政書差規例有巡鹽到任
規費有過所稱掣鹽斤有到任預借息銀請悉行
勒石嚴禁以裕商民從之四十八年廣東巡撫范
時崇請均派行銷鹽引並改就近食鹽以利商民
從之五十三年加增川省鹽引從巡撫年羹堯請
也五十七年派京口將軍標下兵一百五十名千
總一員駐劄三江營緝防私販五十八年裁山東
膠萊分司令濱樂分司兼管裁湖北驛鹽道以糧

道兼理五十九年定兩廣鹽務交總督經理

雍正元年

上以鹽法弊竇叢生其正項虧欠非由官吏需索太甚即由商人用度奢靡之故

諭各省鹽政將陋例積習盡情禁革是年議准湖廣鹽價賤時每包以一錢一分九釐為率貴時每包不得過一錢二分四釐二年議准廣西鹽法改為官運官銷是年裁革福建鹽院衙門各官及各埠商人

其應征課餉均攤各場交州縣官照數收納又議准廣東鹽法委官監收將場商停設惟留埠商使完課運鹽其無人充商之地著地方官領鹽運銷如引多壅滯聽其通融銷售是年增給粵省竈丁鹽價又議准兩廣舊裁運同一員仍於潮州復設又准福建汀州引課即令該知府管理又定各處行鹽以本年成本輕重遠近腳費酌量時價隨時銷售三年開荊州巴東縣鹽場照准行引分銷楚

北州縣是年裁波羅冲可克地方鹽務通判並駐
防官兵五年雲南總督鄂爾泰疏定滇省黑白鹽
井減價增薪之例六年定河南汝寧府引鹽停止
知府彙銷令各州縣招募水商辦課該州縣按季
督催各銷各引又准兩淮鹽場設立竈長保甲稽
查私獎又嚴鹽場竈戶私置盤鐵之禁

按深者為
盤淺者為

鐵守燒
鹽具

又定淮北曬掃餘鹽令商人收買配運酌

加引課七年清理山東鹽務添設膠萊運判一員

八年除山東青登萊三府鹽商聽該屬民人領票
銷賣其課銀攤入地糧征收九年

飭兩江總督兼總鹽務十年定廣東子鹽配引之例

按餘鹽謂

之子鹽正鹽倘有遞缺即以子鹽配引行銷

又准加給廣東竈丁鹽價

每包一錢二分從總督鄂彌達請也十一年定淮

南三江營設巡道一員督緝又於儀徵之青山頭

立專營設守備一員分駐巡緝十二年添淮南儀

所監掣官改福建鹽政衙門為鹽法道專管鹽政

是年定粵省收買場竈餘鹽以清私販十三年九

月

皇上登極

諭兩淮場竈應征折價錢糧自雍正十二年以前逋欠

悉予蠲免

乾隆元年改浙江巡撫為總督管理浙江鹽政係舊

布政使

魚管

裁滇省課務餘銀按舊例正課外有增添
盈餘銀以備地方公用

定浙鹽增斤改引之法

杭嘉湖三所引鹽每引增
五十斤松江所改行票引

每引增鹽
四百斤

停止浙江領發餘引定廣西鹽價仍照

雍正年部定之數每斤減價二釐二年免兩廣鹽

課餘平銀兩

按舊例粵商完餉每五十兩餘平頭銀外征收飯食銀十五兩餘平銀二

十五兩是年
悉令豁免

四年定貴州省古州等處鹽埠銷引

徵課額

古州係新闢苗疆向無引課茲定古州為總埠丙妹永從三角坐等處為子埠由古

州總埠分撥銷售其商人歸古州同知管轄

停止浙省儲餘鹽之例免

雲南各鹽井歸公之項及黑井鍋課銀兩定淮鹽

貴賤增減之價七年

諭閩省有司於應徵鹽課加派長價並巧立單錢各項
名色著該督撫通行禁革定福建招商行引之法

按雍正

正五年即招水商行
銷是年始行請引

准兩廣總督慶復疏言粵省

鹽漏太多請將沿海數處分撥改種稻田以重本
計又准慶復疏言粵省各埠額引有易銷者難銷
者請按地勻撥通融銷售八年議准兩淮乙卯綱
未完引額提入癸亥綱閏月內帶銷九年改撥川
鹽增引行銷滇省接濟民食其應徵課銀仍照川

省舊例計算收納十年准兩淮添鑄煎鹽盤角二
十七副十一年豁免海鹽二州縣鹽場帶征銀兩
十二年定淮鹽運楚裝載船斤例並於湖北漢口
建常平倉廩蓄貯遞年未銷鹽引以備接濟十三
年加給兩淮引額鹽斤又定運銷江西鹽價價賤時每

引以五兩五錢七分九釐為率貴時不得過五兩九錢八分五釐

又定江西鹽價

照楚省例每引加餘息銀二三錢十六年

諭近年淮商急公輸課頗為踴躍著於引額外每引增

給十斤又豁竈丁因災帶征折價銀兩又

諭兩淮鹽政於公項內動銀數萬兩准煎丁逐年赴官
借領春借冬還不必加息又各省鹽引原聽自相交
易無官為限制之例惟淮鹽行運江楚曾因撫臣
題請將各商運楚成本分定價貴價賤自定價後
商人總以貴價銷售經部臣議駁請將貴價盈餘
追繳

上諭卹商裕民本屬一事若任其屢擡時價則於民食

有害勒定賤價商人又以成本有虧紛紛籲請今計各商比年行請價直於成本自可無虧將來即過年歲不齊不過如今之所稱歉年而止嗣後淮商即於應貴之年不得將現在所銷價直外復議再增至於豐稔可以酌量平減該督撫會同鹽政隨時籌畫部臣亦不必執定例駁詰至部議已賣貴價復令追繳若云給還食鹽之戶於勢固有所不能否則以所餘歸之官帑於政體尤有不可著免其追繳河東鹽政

西寧疏請河東續添餘引二十四萬道酌減四萬
道其餘二十萬作為定數並請將陝西咸寧等處
升斗改照部式舊用升斗較部頒之數加重故請改正俱從之十七
年

諭蘆商積困之餘若按斤加課未免拮据著將所加鹽
斤減半納課永為定額其積欠加斤課銀十四萬餘
兩一併豁免

按前因長蘆各商積欠甚多令每引加鹽五十斤分派行銷以裕商力續經部

覆每年應增課銀八萬九千餘兩至是以該商
舊欠甫清若按斤加課未免累商故輕減一半十

八年免天津餘引課銀二十一年以河東池鹽歉收准借長蘆餘鹽配運接濟尋又增復餘引四萬道又定粵東海康等縣場埠統歸官辦二十二年聖駕南巡加惠淮商每引加增十斤不在原定成本之內以二年為限山西巡撫塔永寧等以河東池鹽歉收請運蒙古鹽接濟從之二十四年以河東池鹽歉收准配銷花馬池鹽斤接濟定廣西南寧等府土民鹽井仍歸官辦二十五年兩淮鹽政高恒

奏甘泉江都等州縣食引壅積請撥網地融銷部
議兩淮行鹽口岸通融改撥例有明禁且江甘二
縣逼近場竈尤為私鹽充斥之所若派撥網地非
特私鹽易滋透漏而網地悉為食引所佔殊於鹽
法有碍應不准行得

旨高寶等十四州縣照鹽政所請其江都甘泉二縣著
照部議二十六年

諭兩淮鹽務經費浩繁商力不無拮据著廷臣會同該

督撫鹽臣詳悉具奏尋議一擬派餘引宜均攤衆商以普利澤一外支銀兩除公務應用不得濫行開銷一辦理常貢宜酌定用數以備查核一鹽政養廉宜裁減五千歸之公項一匣商費用宜嚴加查察以免通網派累一網食引鹽宜照例行銷不得濫為通融一私鹽透漏宜嚴加查緝以疏引目從之又

諭長蘆鹽課未完銀四十二萬兩分作五年帶征二十

九年加增長蘆鹽價及滇省黑白二井薪本又兩淮鹽政高恒疏言本年甲申一綱不敷民食請預提乙酉綱引四十萬道分給領運從之三十年准兩淮豫提丙戌綱引給商接濟又准河東額外存

鹽照兩淮例配用餘引又酌增山東行鹽餘票

雍正

元年增餘票五萬道乾隆元年復增一千五百道五年六年增一萬五千道至是又增一萬五千道

三十一年准鹽政高恒請預提丁亥綱引二十五

萬道給商接濟三十二年

上恭奉

皇太后安輿

巡幸天津

諭將長蘆通綱鹽課改於十一月底奏銷又以兩浙商人籲懇攜衆赴津抒誠祝

嘏忱悃可嘉加

恩將每引額定鹽斤外加鹽五斤免其輸納課項以一年為滿是年以淮南北各場歛收

諭將已丑綱奏銷展至八月題報三十六年

上臨幸天津

諭長蘆鹽價准每斤暫增銷一文以降旨之日為始定
限一年仍照舊值行銷其本年引課分作三年帶徵
以舒商力是年

上莅山東

諭將乾隆三十五年正課分作八年帶征並准照長蘆
之例每斤暫加銷一文定限半年以資充裕三十八

年

諭長蘆商衆貲業素微前兩次巡莅天津閱視鹺務深
悉其情是以節次加恩增價帶徵今翠華臨幸各商
無不踴躍歡呼但念伊等第一次銀兩業已完交而
第二限帶徵之銀與本年正課同時並納仍不免少
形竭蹶著再加恩將三十七年正餘課項自三十八
年奏銷後起分限六年帶徵三十九年准長蘆鹽政
西寧疏請將乾隆三十六年第三限銀兩並三十

七年六限銀兩統俟本年奏銷後分限十年帶征
是年山西巡撫已延三鹽政常齡疏言河東大池
產鹽歉薄不敷配運請於河東開濬六小池並撥
運蘆鹽接濟從之又准四川總督文綬請令開淘
犍為縣鹽井照例徵收課銀又鹽政李質穎以黃
河水漫淮鹽被浸請將淮北甲午綱未運引鹽應
完正課銀自乙未綱起分限五年帶徵從之四十
年又准兩淮將乙未綱限至來年八月造報並准

淮北上年被水各商仍將丙申以後四綱帶徵銀
分作八年完納又

諭河東鹽價未平其小鹽池六處甫經開採接濟所得
贏餘未能補足前兩年歉收之數商力不無拮据著
加恩照該撫巴延三等所請將從前暫增二釐鹽價
再行展限三年俾轉運益資充裕四十一年

上奉

皇太后安興巡幸山左

諭將山東商人本年應徵乾隆四十年四十一年引票
正項銀及未完儲項銀自本年奏銷後起限分作八
年帶徵四十三年定山西巡撫兼管河東鹽務四十
五年

上巡江浙途經直隸山東

諭將長蘆商人應徵乾隆四十四年鹽課內十分之一
分作五年帶徵其山東商人並將乾隆四十五年應
徵票引鹽課銀自本年奏銷後起限分作六年帶征

四十七年豁免淮南商人應繳提引餘利銀二百萬

兩

先是淮南商應繳提引餘利銀分作二十一限完繳時該商已完繳十三限其餘八限尚應交銀

三百八十六萬六千餘兩茲豁免二百萬兩其下欠一百八十六萬六千餘兩仍照原限完交

上以河東池鹽招商輪換書吏多有指勒情弊

諭山西巡撫農起嚴密查訪力為革除其如何公平輪換不致偏枯之處並令悉心籌畫妥議尋議商人五

年輪換最易滋弊請行停止現於各商中擇其殷實者定為長商併將引地分作上中下三等配搭

均勻分閩掣認免致偏枯又以河東池鹽全係陸
運需費浩繁商力時形竭蹶請每斤量加價值二
釐連乾隆二十六年請加之價作為定額四十九
年又將淮南未繳餘利銀一百八十六萬六千餘
兩全行豁免又免淮省竈戶所有乾隆四十五六
等年帶徵未完銀七千九百餘兩又山東應徵引
課銀三十六萬餘兩長蘆應徵引課銀四十九萬
餘兩准作八年帶徵兩廣總督舒常疏言粵東舊

設總商派捐津貼銀兩散商輓轆轉運積欠甚多
請照乾隆二十三年清查積欠例分限帶徵並將
總商裁革以杜勒派之漸從之

皇朝通志卷九十一

欽定四庫全書

皇朝通志卷九十二

食貨畧

十二

屯田

新疆屯田附

臣等謹按屯田之制原以寬民力而裕兵食也自漢唐以來或屯於兵或屯於民或兵民兼屯至明而又雜出於商綱紀不立轉輸不繼而其弊出矣我

朝疆土宴安外鮮兵興之費內無饋餉之勞以故屯
地陞為官莊屯軍改為運軍而無運衛所悲行裁
革內地屯田迥非舊制惟

聖祖西事之初

諭將軍費揚古穆克登等於額德爾齊老圖錫濟木鄂爾
坤圖拉等處擇地駐兵屯種開渠引水教之稼穡數年
之間化磽瘠而為沃土者數百萬頃

皇上御宇之二十年

遣大兵征準噶爾回部

詔令軍機大臣先於額爾齊斯所屬及巴里坤吐魯番
呼圖拜等處漸次屯種以備軍興及回部蕩平新
疆展拓二萬餘里泉甘土肥地氣和暖無異內地
皇上念切民依復度地開屯撥軍承田願往者資以車
輜初墾者給其牛種察稞種之燥寒計收穫之先
後使荒陬僻壤之民盡享盈寧之利是豈若前代
之僅以防邊鄙惜漕費為計者哉茲輯通志以內

地屯田及新疆屯田各為類誌以彰

昭代中外一統之隆規焉

順治元年

諭凡州縣衛所無主荒地給流民官兵分段屯種二年差
御史一員週行巡視改衛軍為屯丁每衛設守備
一員兼管屯田量設千總百總分理衛事裁故明
所設衛指揮衛副指揮及屯田御史而以各省巡
撫兼理焉時浙江所屬金鄉等衛有運無屯杭寧

溫台嘉湖嚴衢各衛所有屯帶運金處紹等衛所
無屯有運向來漕船一隻例派屯田一百五十一
畝有奇至十三年定屯丁貼運例其例凡帶運衛
所照數分派徵餘田之租貼無屯衛所至有屯無
運衛所願承運則照例給田不願承運則計田徵
租貼無屯衛所於是屯運始無偏病

康熙初投誠兵攜帶家口數倍正兵隨標者月給
餉糧歲糜八十餘萬御史蕭震疏請分給荒地官

給牛種使之屯田以足軍儲又言蜀黔二省地多人少宜興屯田之制令駐一邑之兵即耕其邑之地駐一鄉之兵即耕其鄉之地則養兵之費既損而荒田日益加闢從之十五年令直省督撫檄州縣衛所各官清釐民地屯地以杜影射之弊

雍正二年以內地無漕運衛所隸歸有司裁山東山西湖廣江西江南浙江廣東諸省都司三年裁浙江杭州等衛屯千總時吐魯番歸附

諭令遷入內地又以安西涼州諸駐防兵屯墾未備家食頗艱令不願久住者另募民人頂換擇宜苗地土分給屯墾其新募人衆未省耕作兵三名僱幫夫一名俟資糧既裕再移家口永遠駐防

乾隆二年新定貴州苗疆督臣張廣泗請將逆苗絕產安設屯軍

上諭經理苗疆原以寧輯地方並非利其土田豈忍收其田畝以給內地人衆不允所請後經王大臣議請

今實在無人承認絕產賞給屯兵擇形勝建築堡
牆以資捍禦又甘肅涼州府鎮番縣之柳林湖地
自雍正十二年招集民人屯墾至是墾地二千三
百餘頃地既遼闊屯戶亦衆乃設立屯長總甲四
年復募農民及官兵餘丁承種安西口外屯田所
獲糧穀官收四分民收六分餘地任隨開墾十二
年准提督拉布敦議於口外八溝塔子溝等處設

兵屯田

八溝即今熱河之平泉州塔子溝即今熱河之建昌縣均於乾隆四十三年新建

二十一年募民屯種瓜州

瓜州即今甘肅安西州地

先是吐魯

番為準噶爾所逼遷居內地瓜州至是準噶爾平

定復移歸故土遺成熟地畝二千四十餘頃總督

黃廷桂請招就近民人屯種每戶給田三十畝二

十四年陝甘總督楊應琚請每戶加墾田三十畝

改屯陞科二十六年應琚又言安西府淵泉縣之

柳溝布隆吉爾

安西府今改為安西州淵泉縣裁

與玉門縣之靖

遠赤金等處所招屯戶生齒漸繁歲收不足敷養

請於原種屯田外擇可墾餘地分給增墾亦照瓜
州例改屯陞科二十七年甘肅布政使吳紹詩又
請於柳林湖屯田亦照瓜州例改屯陞科三十一年
計直省屯田三十九萬二千七百九十五頃先是
乾隆十二年

諭各衛所屯田典賣民間者聽備價歸贖至四十年湖
南布政使覺羅敷福奏湖南五衛屯田有別伍項
買者即與同伍無異應編入原船按糧承差仍聽

本軍歸贖如民人頂買而或年遠造房築墓及軍
逃地荒另行開墾者免贖照舊例貼費當差其餘
概令歸贖未贖時將現業按糧貼費以襄運務並
將原議民戶典賣屯田編入軍籍之例改正停止
湖北巡撫陳輝祖亦疏請清出武昌衛典賣屯田
加津贍運部議典賣屯田未必盡係現運之丁而
執業者亦恐非起首承買之戶應加重津貼從之
新疆屯田附

康熙五十四年

聖祖仁皇帝西事之初

諭將軍費揚古於額德爾齊老圖屯田駐兵費揚古因度
定蘇勒圖哈喇烏蘭固木科布多等處請撥土默
特兵一千每旗令台吉塔布囊一人率往屯種再
遣大臣一員監管時傳爾丹願往効力

諭即令其董事後又屢交附近邊民及發軍前贖罪人增
墾凡錫濟木布隆吉爾阿爾滾固楚等處開渠引

水化積沙為沃壤者數百萬頃

雍正三年

諭振武將軍穆克登開鄂爾坤圖拉一帶屯田十年工部
侍郎瑪爾泰又請撥額塞勒彈城所駐步兵並發
西寧馬步兵合二千人赴哈拉該圖墾耕從之十
三年以定邊將軍慶復請撥綠旗兵一百守營綠
旗兵及家選兵各二百於鄂爾坤地方擇水土佳
處開設營田

乾隆元年王大臣議鄂爾坤等處地界寬廣宜另撥兵三千以慶復原摺付軍營將軍等按地分給每兵丁種二十五畝計可墾田七百餘頃明年額駙策凌請以換班綠旗兵六百再撥一千九百前往以一千五百擇地屯種以一千分駐塔密爾鄂爾坤兩處防守倉庫復經王大臣議定除駐防兵外所需兵千五百名即以綠旗兵六百并罪人一千有餘前往開耕不另派兵往二十年大兵進征

準噶爾回部

諭先期於額爾齊斯所屬駐兵屯田以所得穀糧備往
來兵丁之用於是定屯地於伊蘇圖堅格爾等處移
布勒罕兵一千名駐劄鄂倫倬爾照管三十一年
諭兆惠度伊犁地方可屯種處預行籌報兆惠因言自
巴里坤至濟爾瑪台濟木薩烏魯木齊羅克倫瑪
納斯安濟海雅爾晶及崆吉斯珠勒都斯等處可
耕地段甚多而伊犁附近地方尤有萬人耕種之

地請因見在回人三十餘名量增兵數百分地試種俟有成效時再請增屯乃

諭軍機大臣酌派內地兵民攜籽糧前往照西安屯墾例屯墾二十二年復設塔里雅沁屯田又以親王成衮扎布言派綠旗兵丁及留新回衆於吐魯番屯田時總督黃廷桂言巴里坤尖山子起至奎蘇一帶百餘里地畝俱經先年開墾舊地宜派甘涼肅三處官兵一千先行疏濬水源俟土膏萌動時分

布各兵翻犁試種而兆惠又以烏魯木齊地廣而
腴又與吐魯番相近奏請大興屯田

上諭黃廷桂奏稱派兵巴里坤屯田固應及時籌辦而
烏魯木齊等處亦須漸次開屯其相度水利測驗土
脉派兵料理之處仍命黃廷桂詳悉具奏並傳諭兆
惠等留心經畫自是籌辦屯政多於烏魯木齊矣二
十三年雅爾哈善言烏魯木齊等地方如哈喇沙
爾地最廣海都河水甚足約需兵二千名托克三

可得五百兵丁屯種之地其烏魯木齊約需兵丁
千名惟闢展魯克沁與吐魯番除官兵回人屯種
外因水乏尚無多墾之處今擬於哈喇沙爾派兵
二千四百烏魯木齊原派兵五百增派五百托克
三量增兵五百闢展仍派兵四百共需兵四千三
百攜帶牛種馳赴開屯其後侍郎永貴又言烏魯
木齊地廣而荒現在屯田兵三千六百名俟查勘
再議托克三餘地儘多應再增兵四百哈喇沙爾

地廣衍應再增兵二千名疏入得

旨允行是時經理回部大功未竣從前兆惠估度伊犁情形尚未通行

上以伊犁地形較遠於屯政似可緩圖惟烏魯木齊及噶爾藏多爾濟遊牧之羅克倫等處亟宜廣行開墾以收地利將來由近及遠自可漸通伊犁於是黃廷桂建言烏魯木齊以內如察罕烏蘇穆壘一帶多係沙磧難於開墾由穆壘至烏魯木齊則曠

地最多乃

命努三率道員薩瀚前往詳勘努三等勘定自穆壘至
烏魯木齊有噶爾藏多爾濟遊牧之昌吉羅克倫
等處可耕地畝十六處計需兵六千八百名繪圖
呈

覽旋又言昌吉距烏魯木齊六十餘里丈量可墾田八
萬餘畝羅克倫距昌吉四十里丈量可墾田七萬
餘畝宜各駐兵一千五百名更番開種乃令黃廷

桂於內地綠旗兵先派七千續派三千均給農工
器具發往越明年總督楊應琚又請於凱旋綠旗
兵截留四千增屯特納格爾昌吉羅克倫三處二
十五年

特命調巴里坤綠旗兵九百名赴烏魯木齊增屯時安
泰奏稱屯田以漸開擴自烏魯木齊至羅克倫宜
擇水土饒裕之處立四村莊每莊屯兵八百叅贊
大臣阿桂亦奏稱伊犁河以南之海努克與固勒

扎綿亘百里水土沃衍宜即於此處度形勢分立
村莊先行屯種而副都統伊柱遂領回民三百餘
人馳赴伊犁率官兵駐劄海努克經理溝渠安設
村堡蓋是時回部全定屯政自近及遠已由烏嚕
木齊直通伊犁矣於是叅贊大臣舒赫德請因伊
犁見屯回民三千再派五百令挈眷前往阿桂亦
請再派回民二百名綠旗兵九百名陸續遣送其
河以南之海努克築城屯回民三百察罕烏蘇築

城屯綠旗兵一千河北之固勒扎築一大城為總
匯凡駐劄大臣公署及倉庫咸隸焉二十六年安
泰請以闕展哈喇和卓托克三三處屯兵止留六
百名見地屯種其餘悉撥往伊犁其空地畝另
招回人承佃輸租是年安泰又請設瑪納斯庫爾
喀喇烏蘇晶河等處屯田其後又以親王成袞扎
布言派烏里雅蘇台綠旗兵一百名赴科布多屯
田又移羅克倫兵丁六百名屯田於呼圖拜時烏

噶木齊屯田五處比歲豐盈安泰請以見駐綠旗
兵三千以一千屯田二千差操互相更換

上以千人屯田勢必不敷乃令兵丁有願挈眷居住及
內地民人思往立業者著楊應琚分給田畝籽種
妥協安插應琚言巴里坤廣衍腴饒除兵丁屯種
外應請招商民認墾按限陞科二十七年以侍郎
旌額理言將發遣烏噶木齊流犯人給屯田二十
五畝攜家眷者額外給地五畝與兵丁一體輸租

時葉爾羌回人移居伊犁者前後共三百二十四
戶合經制屯種回人一千戶叅贊大臣阿桂乃別
老弱不能屯田者七十四戶交伯克養贍其年力
精壯者定為一千二百五十戶分駐伊犁河之南
北兩岸屯莊相望在河南者則於霍濟格爾巴克
編設一屯安置八十戶海努克編設一屯安置七
十戶其餘俱屯河北固勒扎等處二十九年將軍
明瑞言日前遷來伊犁回人惟於巴爾托輝築一

小城仍於河北固勒扎內總滙今回民俱稱巴爾
托輝泉甘土肥自願出力築一大城移駐屯墾若
如所請將回人稍遷迤西可空出摩垓圖阿里瑪
兩處水泉為滿洲兵屯田之用又續請各回城再
添回民二千赴伊犁屯田俱從之是歲甘肅皋蘭
等二十二州縣均有被災之處

上以緣邊瘠土之民生計殊艱年來新疆屯政屢豐並
無旱潦之虞

諭楊應琚於接壤居民有願往者量道里近便開導撫

綏遷移新屯於肅州敦煌招民七十餘戶給車輛解

送越明年又於肅州招民八百餘戶高臺縣招民

四百餘戶隨移文於呼圖拜邊城昌吉羅克倫等

處駐劄大臣擇膏腴地分給安種

按二十六年應琚招來肅州安

西高臺貧民往烏魯木齊者三百戶又續報河西一帶願往烏魯木齊者數百戶又報招獲民人往

巴里坤者首先二十七戶續招三十九戶時有山西臨晉縣民盧文忠率家人自備資斧呈請往耕

應琚奏聞監生項帶以示鼓舞

上賞給時應琚又請添兵加墾巴

里坤地畝又言巴里坤迤西之穆壘直接烏嚕木
齊新屯之特訥格爾中間計有十餘處泉水暢流
可墾上腴地數十萬畝請招就近無業貧民照例
給車輛口糧資送屯墾其特訥格爾並設官兵駐
劄是年開塔爾巴哈台地屯田於雅爾玉勒兩處
築城駐兵一千五百

謹按新疆泉甘土肥不減內地
皇上安撫盡善凡駐

防官兵現屯回民及新招民衆莫不視為樂土其
於各村堡歲收逐年造冊題奏

上視所獲多

窮軍民賞給官吏議叙
屯政之行式靡無外已三十六年土爾扈特汗烏

巴什率全部來歸因

命舒赫德代伊勒圖為將軍駐伊犁安輯新附之衆授
之牧地其部衆量地分編安屯教耕三十七年陝
甘總督文綬奏新疆屯田雖已廣闢而餘地尚多
必須廣為招徠因條具五事一招新疆商賈傭工
之人就近認墾以省咨送一指明新疆地名道里
情形曉諭戶民以期樂從一嘉峪關請每日辰開
酉閉以便商民一烏魯木齊大路數丈請修治寬

閼以利行旅一安西溝渠應疏濬暢流以益灌溉
諭下廷臣集議施行三十八年伊犁客民四十八戶呈
請入屯田戶籍開屯西河灣等處經將軍舒赫德
題請因議每戶給地三十畝願多者聽初墾時官
借籽種分年完項以次酌定科則三十九年烏嚕
木齊續墾地成熟奏請陞科三十二年至三十七年兵民所墾地已陞
科至是以總督勒爾謹於三十四年請撥遣四十
犯百三十戶墾地已屆六年故請入額陞科
年以伊勒圖奏令塔爾巴哈台等處綠營屯田及

辦事大臣按照地方情形仿伊犁烏魯木齊等處
議定分數分別辦理其巴里坤哈密遣犯種地交
糧亦准照該處兵丁一例勸懲是年巴里坤報續
招民戶墾地三千畝四十一年兩金川蕩平將軍
阿桂奏請於金川地方設鎮安屯凡兵丁有願攜
眷者初至墾種於應得錢糧外賞給鹽菜口糧四
十二年四川總督文綬疏定綠旗兵攜眷遠徙應
使其眷屬均有所資合力耕作方於屯政有裨請

按各家屬名口酌借口糧由屯員按月支給俟成熟徵還報部從之四十三年文綬又以四川省攜眷屯丁所種新疆地畝瘠薄請照民戶例每丁給地三十畝

烏魯木齊兵丁例每丁三十畝

各給牛一農具一併借

給口糧尋將軍特成額又奏准每兵所種三十畝

地內以二十畝供賦十畝給兵眷養贍以繼月餉

鹽米之不足四十八年總督福康安奏降番戎噶

阿甲等自四十一年投誠安插美諾等屯種計千

四百十三戶至四十七年例應起科請照漢牛降
番例每戶徵雜糧二斗一升八勺五杪從之

皇朝通志卷九十二